

松溪縣志卷之九

人物志

閩里昌平衣冠如昨堯墟舜甸各德斯存千載低徊
繫人思慕雖不能至心嚮往之至如碑題有道之賢
鄉竊鄭公之號載稽往籍何地無才松雖下邑僻處
海隅然當年推本於道德性命之旨忠孝節烈之傳
文章燦為國華武功垂於竹冊精英媲美焜耀一時
若其各隱巖棲蕭條高寄杏林槐岫避迹塵寰絲綸
之奕葉增輝金粉之霜標挺節旅遊僑寓芳躅堪追
卓錫燒丹孤踪遂往一有於斯無遺採輯倘一事而
兩志豔稱一人而群書互載地以人重藉為典型好
古多聞恐遺往蹟表而出之弗可苟也志人物第九

松溪縣志

卷之九

人物志

一

宋

理學

李綱字伯紀自其始祖居無錫父夔元豐進士元
祐中為松溪縣尉生綱於衙舍之劍峯堂長而潛
心理學樂志孔顏登政和二年進士第積官至監
察御史兼權殿中侍御史以言事忤權貴改比部

員外卽遷起居卽宣和元年京師大水綱上疏言
陰氣太盛當以賊盜外患爲憂朝廷惡其言謫監
南劍州沙縣稅務七年爲太常少卿金人渝盟邊
報狎至綱上禦戎五策旣又刺臂血上疏云今大
敵入攻安危所繫惟假皇太子以位號天下可保
欽宗卽位除兵部侍郎靖康元年以綱爲東京留
守未幾上欲南狩綱力爭之遂命綱爲親征行營
使以便宜從事金將幹離不兵渡河綱沿守戰之
具不數日而畢敵兵攻城綱身督戰募壯士縋城

而下斬酋長十餘人殺其衆數千人金人知有備
乃退求遣大臣至軍中議和綱請行上遣李梈綱
曰安危在此一舉臣恐李梈怯懦而誤國事也上
不聽竟使梈往金人須金幣以千萬計求割太原
中山河間地以親王宰相爲質梈受事自不措一
辭還報綱謂所需金幣竭天下且不足况都城乎
三鎮國之屏蔽割之何以立國至於遣質卽宰相
當往親王不當往若遣辨士姑與之議所以可不
可者宿留數日大兵四集彼孤軍深入雖不得所

欲亦將速歸此時而與之盟則不敢輕中國而和
可久也宰執議不合綱不能奪求去上慰諭曰卿
第出治兵此事當徐議之綱退則誓書已行所求
皆與之以皇弟康王少保張邦昌爲質時金人需
求不已日肆屠掠綱率諸將與戰以神臂弓射却
之金使復來李邦彥語之曰用兵及李綱姚平仲
非朝廷意遂罷綱太學生陳東等詣闕上書軍威
不期而集者數十萬帝亟召綱命復爲尚書右丞
充京城四壁守禦使綱下令能殺敵者厚賞衆無

不奮躍金人惧稍稍引却且得割三鎮詔及親王
爲質乃退師除綱知樞密院事綱奏請如澶淵故
事遣兵護送且戒諸將可擊則擊之乃以兵十萬
分道並進將士受命踴躍以行而宰相咎綱盡遣
城下兵追敵恐倉卒無措急徵諸將還諸將已追
及金人於邢趙間遽得還師之命無不扼擊比綱
力主復追而將士解體矣時金兵北去上下恬然
置邊事於不問綱獨以爲憂及太原圍未解种師
中戰沒師道病歸上以綱爲河東北宣撫使御批

日促解太原之圍而諸將承受御畫事皆專事
時方議和詔止綱進兵及金兵再至上悟和議
非除綱資政殿大學士領開封府事綱行次長
被命卽率湖南勤王之師入援未至而都城失
高宗卽位拜尚書右僕射兼中書侍郎綱疏十
翌日班其議于朝開封守關綱以畱守非宗澤不
可力薦之綱又進三疏及省冗員浮費上皆從其
言時黃潛善汪伯彥陰上巡幸東南之議綱曰國
之存亡於是焉分吾當以去就爭之疏上畱中不

報綱乃再疏求去旣行而車駕遂東幸兩河郡縣
相繼淪陷凡綱所規畫軍民之政一切廢罷而金
人攻京東西中原盜賊蠡起矣紹興二年復除綱
觀文殿學士湖廣宣撫使兼知潭州是時荆湖江
湘之間流民潰卒群聚爲盜賊多者至數萬人綱
悉蕩平之上言荆湖國之上流其地數千里今朝
廷保有東南控馭西北如鼎澧嶽鄂若荆南一帶
皆當屯宿重兵倚爲形勢使四川之號令可通而
襄漢之聲援可接乃有恢復中原之漸議未及行

而諫官徐俯劉裴劾綱罷爲提舉西京崇福宮四年冬金人來攻綱具防禦三策詔付三省樞密院施行時韓世忠屢敗金人於淮楚間有旨督劉光世張浚統兵渡河車駕至江上勞軍五年詔問攻戰守備措置綏懷之方綱條六事奏上賜詔褒諭除江西安撫制置大使兼知洪州六年綱對內殿言今日用兵之失者四措置未盡善者五宜預備者三當善後者二時宋師與金人僞齊相持於淮泗者半年綱奏兩兵相持非出奇不足以取勝宜

速遣驍將自淮南約岳飛爲犄角夾擊之大功可成已而大破僞齊兵於淮淝之上車駕進發幸建康綱奏乞益飭戰守之具修築沿淮城壘八年王倫使北還綱上疏曰臣竊見倫與金使偕來乃以詔諭江南爲名不著國號而曰江南不云通問而曰詔諭此何禮也臣試爲陛下言之金人毀宗社逼二聖而陛下應天順人光復舊物自我視彼則仇讎也自彼視我則腹心之疾也豈復有可和之理然而朝廷遣使通問冠蓋相望於道卑辭厚幣

無所愛惜者以二聖在其域中爲親屈已不得已而然猶有說也至去年春兩宮凶問既至遣使以迎梓宮亟往遄返初不得其要領金使之來大畧有五必降詔書欲陛下屈體降禮以聽受一也必有赦文欲朝廷宣布班示郡縣二也必立約束欲陛下奉藩稱臣稟其號令三也必求歲賂廣其數日使我坐困四也必求割地以江爲界淮南荆襄四川盡欲得之五也此五者朝廷從其一則大事去矣金人變詐不測縱使聽其號令奉藩稱臣其

志猶未已也必使或親迎梓宮或使單車入覲或使移易將相或改革政事或竭取租賦或股削土宇從之則無有紀極一不從則前功盡廢反爲兵端使國家之勢單弱果不足以自振不得已而爲此固猶不可况土宇之廣猶半天下臣民之心戴宋不忘與有識者謀之尚足以有爲豈可忘祖宗之業生靈之屬望弗慮弗圖遽自屈服冀延旦暮之命哉臣願陛下且弗輕許深諾詔群臣講明利害可以久長之策擇其善而從之疏奏雖與衆論

一合上不以為忤曰大臣當如此矣九年除知
州荆湖南路安撫大使綱具奏力辭曰臣迂疎無
周身之術動致煩言今者罷自江西為日未久
蒙湔拔昇以帥權昔漢文帝聞季布之賢召之既
而罷歸布曰陛下以一人之譽召臣以一人之毀
去臣臣恐天下有以窺陛下之淺深願臣區區進
退何足少多然數年之間亟奮亟躡上累陛下任
使之明實有係於國體詔以綱累奏不欲重違
允其請次年薨年五十八贈少師綱負天下之望

松溪縣志

卷之九

人物志

七

以一身用捨為社稷生民安危雖屢用屢斥忠誠
不少貶不以用舍為語默義氣凜然動乎遠邇每
宋使至燕山必問李綱趙鼎安否其為遠人所畏
服如此綱著有易傳內篇十卷外篇十二卷論語
詳說十卷文章歌詩奏議百餘卷又有靖康傳信
錄奉迎錄建炎時政記建炎進退志建炎制詔表
劄集宣撫荆廣記制置江右錄

朱熹字元晦一字仲晦徽州婺源人因父希齊公
松官政和墓父朱公於護國寺往來祭掃熹用僑

寓松溪年十八貢於鄉中紹興十八年進士第爲
同安簿罷歸請祠監潭州南嶽廟孝宗卽位詔求
直言熹上封事隆興元年復召入對歷陳古先聖
王所以強本折衝威制遠人之道時相湯思退方
倡和議除熹武學博士待次乾道元年洪适爲相
復主和論不合歸三年陳俊卿劉珙薦爲樞密院
編修官待次五年丁內艱六年工部侍郎胡銓以
詩人薦與王廷珪同召以未終喪辭七年旣免喪
復召以祿不及養辭九年梁克家相申前命又辭

松溪縣志

卷之九

人物志

八

克家奏熹屢召不起宜蒙褒錄執政俱稱之上曰
熹安貧守道廉退可嘉特改命入官主管台州崇
道觀熹以求退得進於義未安再辭淳熙元年始
拜命三年上欲獎用廉退以勵風俗龔茂良行丞
相以熹名進除秘書卽力辭且以手書遺茂良言
一時權倖群小乘間讒毀乃因熹再辭卽從其請
主管武夷山冲佑觀五年史浩再相除知南康軍
降旨便道之官熹再辭不許至郡興利除害值歲
不雨講求荒政多所全活訖事奏乞依格推賞納

粟人間請郡學引進士子與之講論訪白鹿洞書院遺址奏復其舊爲學規俾守之旋錄救荒之勞除直秘閣改提舉浙東常平茶鹽公事入對首陳災異之由與修德任人之說所奏凡七事上爲動容熹拜命卽移書他郡募米高蠲其征及至則客舟之米已輻輳熹日鈎訪民隱按行境內單車屏徒從所至人不及知郡縣官吏憚其風采至自引去所部肅然凡丁錢和買役法權酷之政有不便於民者悉釐而革之有短熹者謂其疎於爲政上

謂王淮曰朱熹政事却有可觀熹前後奏請多所見抑知台州唐仲友與王淮同里爲姻家大臣交薦之遷江西提刑未行熹行部至台訟仲友者紛然按得其實章三上淮匿不以聞熹論愈力章六上不得已奪仲友新命以授熹辭不拜遂歸旣而運奉祠者五年十四年除提點江西刑訟公事以疾辭不許遂行十五年遂入奏首言刑獄失當次言制錢之病民及江西諸州科罰之弊而其末言天理人欲之辨操於人主之一心是行也有要之

於路以爲正心誠意之論上所厭聞戒勿以爲言
熹曰吾平生所學惟此四字豈可隱默以欺吾君
乎及奏上曰久不見卿當處卿清要不復以州縣
爲煩也時曾覲已死王抃亦逐獨內侍甘昇尚在
熹力以爲言上曰昇乃德壽所薦爲其有才耳熹
曰小人無才安能動人主翌日除兵部郎官以足
疾丐祠除直寶文閣主管嵩山崇福宮未踰月再
召熹又辭熹以口陳未盡乞具封事以聞首言天
下大本與今日之急務大本者陛下之心急務則

松溪縣志

卷之九

人物志

十

輔翼太子選任大臣振舉綱紀變化風俗愛養民
力修明軍政六者是也語多不具載疏入夜漏下
七刻上已就寢亟起秉燭讀之終篇除主管太乙
宮兼崇政殿說書熹力辭除秘閣修撰奉外祠光
宗卽位除江東轉運副使以疾辭改知漳州奏除
屬縣無名之賦七百萬減經總制錢四百萬以俗
未知禮采古喪葬嫁娶之儀揭以示之嘗病經界
不行之害乃訪事宜擇人物及方量之法上之而
土居豪右侵漁貧弱者以爲不便阻之宰相雷正

泉人也其里黨亦多以爲不可行布衣吳禹圭上書訟其擾民詔且需後有旨先行漳州經界明年以子喪請祠史浩入見請收天下人望乃除秘閣修撰熹再辭詔諭論撰之職以寵名儒乃拜命未幾差知潭州力辭有旨長沙巨屏得賢爲重遂拜命會洞獠擾屬郡熹遣人諭以禍福皆降之申教令嚴武備戢奸吏抑豪民所至興學校明教化四方學者畢至寧宗卽位趙汝愚首薦熹除煥章閣待制侍講入對乃者太皇太后躬定大策陛下實

松溪縣志

卷之九

人物志

十一

紹丕圖可謂處之以權而庶幾不失其正自頃至今三月矣或反不能無疑於逆順名實之際竊爲陛下憂之猶有可諉者亦曰陛下之心前日未嘗有求位之計今日未嘗忘思親之懷此則所以行權而不失其正之根本也充未嘗求位之心以盡負罪引慝之誠充未嘗忘親之心以致溫清定省之禮而大本立大倫正矣復面辭待制侍講上手劄卿經術淵源正資勸講次對之職勿復辭勞以副朕崇儒重道之意遂拜命會有孝宗山陵事熹

上議狀不報又奏勉上進德及孝宗祔廟議始轉
侂冑自謂有定策功寧宗立後常居中用事熹憂
其害政數以爲言趙汝愚方謂其易制不以爲意
至慶元中汝愚亦以誣逐而朝廷大權悉歸侂冑
矣熹始以廟議自劾再乞休致詔辭職謝事非朕
優賢之至意依舊秘閣修撰二年沈繼祖爲監察
御史誣熹十罪詔落職罷祠門人蔡元定亦送道
州編管四年熹以年近七十申乞致仕五年依所
請明年卒年七十一疾且革手書屬其子在及門

人范念得黃翰拳拳以勉學及修正遺書爲言翌
日正坐整衣冠就枕而逝熹登第五十年仕於外
者僅九考立朝纔四十日自熹去國侂冑勢益張
何淡劉德秀胡紘劉三傑姚愈高文虎之徒共指
熹爲僞學且爲逆黨選人余嘉至上書乞斬熹是
時士之繩趨尺步稍以儒名至無所容其身從遊
之士特立不顧者屏伏丘壑依阿與懦者更名他
師過門不入甚至變易衣冠狎遊市肆以自別其
非黨而熹日與諸生講學不休或勸其謝遣生徒

者笑而不答熹既沒將葬言者謂四方僞徒期會送僞帥之葬非妄談時人短長則謬議時政得失望令守臣約束從之嘉泰初學禁稍弛後侂冑且死詔賜熹遺表恩澤諡曰文尋贈中大夫特贈寶謨閣直學士理宗寶慶二年贈太師追封信國公改徽國始熹少時家故貧少依父友劉子羽寓建之崇安後徙建陽之考亭又築書室於松溪之湛廬山至今名爲湛廬書院諸生之自遠而至者豆飯藜羹率與之共往往稱貸於人以給用而非其

松溪縣志

卷之九

人物志

十三

道義則一介不取也所著書若干卷學者多有且不能盡列其目淳佑元年以周張二程及熹從祀孔子廟庭

黃幹曰道之正統待人而後傳自周以來任傳道之責者不過數人而能使斯道章章較著一二人而止耳由孔子而後曾子子思繼其微至孟子而始著由孟子而後周程張子繼其絕至熹而始著識者以爲知言熹子在紹定中爲吏部侍郎

真德秀字景元後更爲希元本建之浦城人因其

子孫家於松溪故亦爲松溪人四歲受書過目成誦十五而孤母吳氏力貧教之同郡楊圭見而異之使歸其諸子學卒妻以女登慶元五年進士第復中博學宏詞科嘉定間除太學博士上疏言自韓侂胄專政以僞學斥忠良今日改弦更張正當褒崇名節明示好尚除正字校書郎尋除秘書著作佐郎言金有必亡之勢亦可爲中國憂蓋金亡則上恬下嬉憂不在敵而在我多事之端恐自此始除起居舍人史彌遠方得政以爵祿虛糜天下

士德秀乞補外除秘閣修撰江東轉運副使時金爲蒙古所攻勢將亡朝廷猶與通使德秀朝辭奏國耻不可忘鄰盜不可輕幸安之謀不可恃導諛之言不可聽至公之論不可忽寧宗曰卿力有餘到江東爲朕搏節財計以助邊用江東旱蝗廣德太平爲甚德秀遂與畱守憲司分所部九郡大講荒政而自領廣德太平以便宜發廩賑給竣事而還百姓數千人送之郊外指道旁叢塚泣曰皆往歲餓死者微公我輩已相隨入此矣未幾以右文

殿修撰知泉州番舶畏苛征至者歲不三四德秀首寬之至者驟增至三十六艘輪租令民自槩聽訟惟揭示姓名人自詣州海賊作亂將偏城官軍敗岬德秀親授方畧擒之復於海濱增屯要害處以備不虞十二年以集英殿修撰知隆興府承寬弛之後乃稍濟以嚴尤畱意軍政欲分鄂州軍屯武昌及通廣鹽於贛與南安以弭汙贛鹽寇未及行以毋喪歸明年斬黃失守盜起南安討之數載始平人服德秀先見十五年以寶謨閣待制湖南

松溪縣志

卷之九

人物志

五

安撫使知潭州罷權酷除斛面米申免和糴以甦其民復立惠民倉五萬石使歲出糶又易穀九萬五千石分十二縣置社倉以徧及鄉落別立慈幼倉立義阡惠政畢舉月試諸軍射損其回易之利及官田租凡營中病者死未葬者孕者嫁娶者贍給有差理宗卽位召爲中書舍人尋擢禮部侍郎直學士院入見奏三綱五常扶持宇宙之棟榦奠安生民之柱石晉廢三綱而劉石之變興唐廢三綱而安祿山之難作立國先正名分陛下不幸處

人倫之變流聞四方雲川之變非濟王本志前有
避匿之迹後聞討捕之謀情狀本末灼然可考願
討論雍頤追封秦王舍罪恤孤故事濟王未有子
息亦惟陛下興滅繼絕上曰朝廷待濟王亦至矣
德秀曰若謂此事處置盡善臣未敢以爲然觀舜
所以處象則陛下不及舜明甚人主但當以二帝
三王爲師上曰一時倉卒耳德秀曰此已往之咎
惟願陛下知有此失而益講學進德寧宗小祥詔
群臣服純吉德秀爭之曰自漢文帝率情變古惟

松溪縣志

卷之九

人物志

其

我孝宗方衰服三年衣冠俱用大布孝宗崩羣臣
惟朝會治事易月之後權用墨帶公服時序仍慰
臨至大祥始除侂冑柄政始以小祥從吉且帶不
以金鞋不以紅佩不以魚鞍轎不以文繡此於群
臣何損朝儀何傷議遂格德秀屢進鯁言上皆虛
心開納而彌遠益嚴憚之乃謀所以相撼畏公議
未敢發給事中王堅盛章始駁德秀所王濟王贈
典繼而殿中侍御史莫澤劾之遂以煥章閣待制
提舉玉隆宮諫議大夫朱端常又劾之落職罷祠

監察御史梁成大又劾之請加竄殛上曰仲尼入
爲已甚乃止旣歸修讀書記語門人曰此人君爲
治之門如有用我者執此以往汀寇起德秀薦陳
韓有文武才於史彌忠言於朝遂起韓討平之紹
定四年改職與祠五年進徽猷閣知泉州迎者塞
路深山百歲老人亦扶杖而出城中歡聲動地諸
邑二稅嘗預借至七年德秀入境首禁預借諸
邑有累月不解一邑者郡計赤立不可爲或咎寬
恤太驟德秀謂民困如此寧身代其苦決訟自卯

至申未已或勸畜養精神德秀謂郡弊無力惠民
僅有政平訟理事當勉建炎初置南外宗正司於
泉公族僅三百人漕司與本州給之而朝廷歲助
度牒已而不復給而增至二十三餘人郡坐是
愈不可爲德秀請於朝詔給度牒百道彌遠薨上
親政以顯謨閣待制知福州未幾元人滅金京湖
帥奉露布圖上八陵時江淮有進取潼關黃河之
議德秀以爲憂上封事曰移江淮甲兵以守無用
空城運江淮入穀以治不耕之廢壤富庶之效

未期根本之弊立見惟陛下審之重之召爲戶部尚書入見上曰卿去國十年每切思賢乃以大學衍義進復陳祈天永命之說上欣然嘉納改翰林學士知制誥時政多所論建踰年知貢舉已得疾拜參知政事同編修敕令經武要畧三乞祠祿上不得已進資政殿學士提舉萬壽觀兼侍讀辭疾亟冠帶起坐神爽不辭遣表聞上震悼輟視朝贈銀青光祿大夫德秀立朝不滿十年奏疏無慮數十萬言皆切當世要務直聲震朝廷四方人士誦

其文想見其風采及宦遊所至惠政深洽不遺其言由是中外交頌都城人驚傳頹洞奔擁出關曰真直院至矣果至則又填塞聚觀不置時相益以此忌之輒擯不用而聲愈彰及鄭清之挑敵兵民死者數十萬中外大耗尤世道升降治亂之機而德秀則旣衰矣然自佞胄立僞學之名以錮善類凡大儒之書皆禁絕之德秀晚出獨慨然遺斯文自任講習而服行之黨禁旣開而正學遂明於天下後世多其力也所著書目頗多不具載旣薨上

思之不置諡曰文忠

名臣

宋

吳執中字子權本縣人父概慶曆進士爲著作郎
執中登嘉祐八年進士同門壻呂惠卿方貴盛執
中不肯依附以取進浮沉州縣凡三十餘年始提
舉河南常平連徙河東淮南江東轉運判官入爲
右司郎中大觀初擢兵部侍郎進御史中丞言府
寺監務官陞賞太重乞行裁減又論開封府內侍

松溪縣志

卷之九

人物志

十九

省京畿秦鳳違法干請詔獎其得風憲體初蔡京
忌張康國故引執中居言路執中乃先劾京客劉
炳兄弟宋喬年父子帝語執政嘉其不阿康國曰
是乃爲逐臣地也已而章果上帝怒黜知滁州有
旨取臺疏錄聞上覽執中疏頓悟改知揚州久之
復中丞後遷禮部尚書論者言執中黨張商英降
知黃州未至落職仍奪一官奉祠行至高郵卒宣
和初追復顯謨閣待制靖康間加樞密院直學士

舊志分列宦達郡志載入名臣按郡縣志書從無
宦達一條遂從郡志附紀一則後倣此

陳戩字冲休本縣人登大觀三年進士授鞏州教授改國子博士兼諸王府記室嘗事高宗於潛邸建炎初轉戶部員外郎遷監察御史從幸江浙時統制范瑒附苗劉擁兵跋扈戩馳入瑒壘論以禍福瑒奉命戩入對上喜甚陞太常少卿車駕幸永嘉又疏論兵將用命則寡可以敵衆宜申嚴紀律則敵可破也又言諸將各擁重兵將有尾大之患於是劄軍號神武五軍轉給事中疏論時事五失宰執務姑息將帥邀功賞臺諫言細務監司守臣

多犯法內侍權漸盛宜有以禁止之詔臺諫侍從條具保民弭盜遏虜生財四事戩奏省徭賦尚本業可以保民聽盜賊自相糾擿以追捕多少爲守令殿最可以弭盜占上流據形勢可以遏敵躬節儉量出入可以生財上皆納用又論諸將請政事堂與大臣狎昵紊亂朝綱恐緩急不爲用以寶文閣待制出知處州改知明州尋移泉州乞歸卒於家贈通奉大夫戩娶執中女封永嘉夫人生子鼎字元用紹興初以恩補將仕郎論秦檜奸猾誤國

檜怒曰冲休兒敢論我耶屏之不用家居二十載
召對特賜進士授監察御史所至有聲

明

魏濬字禹卿號蒼水本縣人少警敏隨口屬對皆
工妙太和郭子章一見以遠大期之子章分校丙
子闈首得蘇濬因時時稱閩中二濬不置登萬曆
甲辰進士初授戶部河南司主事奉命監臨清倉
轄河南山東二省糧濬禡蠹役平量入官有餘以
還輸者凡五千石陞郎中轉廣西提學僉事修桂

松溪縣志

卷之九

人物志

三

林諸學禮器創建思恩等州學校較士之暇撫綏
猺獞尋陞江西按察副使備兵南瑞時淮藩以廢
嫡事內外譁然幾至絕國濬爲去構禍者二人并
調八事督令長史盡心勸諫悉更正之冊禮始成
群疑遂釋又豫章宗姓白晝攫金於市濬以聞直
指下諸宗廷尉逮治濬以此拂袖歸旋起山東布
政司叅議駐防青州時遼陽用兵芻粟倚辦山左
濬時教閱將士人人有敵愾意遷湖廣按察使分
轄衡永值黔蜀交訐苗蠻礦徒表裏爲患濬遣人

諭以威福礦徒解散焚其巢二千七百餘所陞江
西左布政未幾擢都察院右僉都御史巡撫湖廣
黔警告急濬以黔楚輔車單車冒暑行訓練士卒
湖山之賊皆不敢動八月謁陵道憇蒼水使者麋
見像類已心惡之未幾疾作將革惟與僚屬言國
恩未報語不及私卒年七十三始官江西入祀名
宦後松人復以譽望呈憲准入賢祠迄今春秋不
絕云濬平生自奉甚約喜周予凡親舊貧者或援
之產或教之學或存恤其後好讀書尤善爲文所

松溪縣志

卷之九

人物志

三

著有易義古象通八卷世畧十五卷武畧十八卷
西事珥八卷嶠南瑣記八卷東粵事摘文摘十卷
緯談一卷太乙括元十卷方言據一卷黃領牒一
卷峽雲前後四十卷

真憲時字法侯號存古本縣人西山先生十二世
孫也萬曆間進士授刑部湖廣司主事陞廣東司
員外署陝西司即中有田德者宦璫之姪也以事
下獄遍賂朝貴托閹人奉憲時千金立叱遣之論
如律後恤刑浙江作爰書傳都下凡恤刑者皆奉

爲法陞江西布司叅議提督學政稱爲真宗師父
艱服闋尋補杭嚴道抑豪右禁游惰轉江西糧道
漕弊一清改山東按司分巡霸州時廣寧失守烈
城震驚憲時備禦有素又請于部蠲遼餉數十萬
緡以蘇貧困己未大計舉天下卓異第三賜宴吏
部天啓四年陞河南按察使覃恩進階尋入覲復
賜廉宴爲第二人逆璫魏忠賢專政憲時言於朝
璫怒會推巡撫忠賢矯旨云真憲時爲楊漣所薦
置身門戶竟削奪崇禎二年准復原官推寧夏巡

松溪縣志

卷之九

人物志

三十三

撫已於元年八月病卒矣憲時嘗念文忠公大學
衍義文章正宗讀書記等書皆闡明心學爲治平
之要嘗獲全本于金陵道中剗剗更新附跋以行
著有爰書及百將傳標旨行于世

良吏

宋

李規字師正本縣人元豐五年進士時陶節夫總
四路節制軍馬討西夏聞規名辟爲宣撫幕官規
協力裨贊招散亡築堡塞夏人遠遁通判環州請

革陝西錢法之弊改夔州運判就移本路提刑被
旨按大獄原釋數百人以平夏功轉朝議大夫致
仕卒有文集十卷

李扶宇持國本縣人父懌朝奉卽扶幼孤事母孝
第進士調海鹽尉永興丞適大冶爲兵火所蕩郡
守及諸司檄攝其事扶至招撫流散安集田里盜
賊屏息百姓晏然改宣教卽知富陽縣以平恕爲
治改廣西經畧司主管薦爲蒼梧守治狀最兩廣
會以疾卒

松溪縣志

卷之九

人物志

二十四

董居安字子安本縣人第進士乾道間知順昌縣
清儉明敏時縣鹺更法帑藏空虛更請如舊令計
民產賃錢居安以爲賦外之歛不聽優游措畫不
煩而辦有追攝傳符下里未嘗一遣隸卒先是令
以隻日晨興收民訟牒居安聽受無時冤枉畢達
訟有所連惟摘一二切要餘無所問民祠祀之

明

董良敬字慎甫本縣人以拔貢任蒲縣典史縣有
疑獄事涉豪貴令不能決一日再鞠召典史令坐

於旁良敬出數語以折之兩造愕然令乃投筆使
爲讞語應手成詞竟坐豪貴法令欲少爲周旋良
敬抗聲曰今日之判衆目共覩禍則典史當之不
可更一字也後召爲侍御史

楊賢字思齊本縣人以貢士除湖廣岳州府通判
署府篆凡府所罰贖次第登冊貯於庫新守至與
交盤畢隨以緩冊進爲地方費同列議其矯賢私
語人曰此府緩也前守旣去後守未來以岳州還
岳州分所應爾非矯也判岳三年陞江西臨安府

松溪縣志

卷之九

人物志

三五

同知

忠節

宋

吳巖夫字民瞻執中子政和中以蔭太廟齋卽累
遷考功員外卽召對論郡縣賦歛煩急百姓怨苦
上竦然異之顧謂左右曰誠吳執中子也請外補
知洋濠二州欽宗內禪召還遷左司卽中嘗語宰
相曰時方艱危願拔寒賤以求實才毋專用虛名
竊位苟祿而已丞相不悅巖夫曰某與公爲道義

交故敢獻直言不然從此辭矣光宗卽位徙光祿卿以虜騎未退率同列上章願涓辰順動以副四海望幸之心章再入時有旨幸維揚後以言事不合遷秘閣修撰知福州改南劍州乞祠居建安未幾卒

陳謙老字希呂戩之裔孫登景定間進士初授縣尉元兵張甚奸臣丁大全用事帝將遷都卽棄職歸咸淳五年正月謙老自記

元

松溪縣志

卷之九

人物志

三

葉景仁字天德少孤重信義至正壬辰以才舉政和縣尉省司薦陞浦城縣尹奉省檄討政和西里寨寇是歲饑以家貲餉兵率衆先入南里遇賊邀擊敗之擒戮渠魁其脅從之民招撫悉宥之生理以安明年進攻賊巢抵西里蛟龍橋賊悉衆來拒景仁累戰敗之乘勝深入後援不繼爲賊所執乃曰吾爲國討賊身死名立遂大罵不止賊斷其右膊而死

明

葉逢陽字子泰本縣人正德丁丑進士辛巳殿試
除平陽縣陞廣信府同知時永陵好道遣內臣督
建上清宮并賜致一真人邵元節宅變宸濠所沒
產得價數十萬屬逢陽主度支事竣羨金六萬餘
內臣欲私之逢陽執不與內臣還譖逢陽逮獄杖
四十初元節以上寵故貴倨逢陽謂是信州屬氓
每來謁輒令隅坐元節亦引分不敢與抗禮後竟
用元節疏得解擢南京戶部員外復以估價事忤
權要謫東平州知州復謫左州居二年杖劓轉劇
獠縣人懷之

武功

元

黃昌元字子仁本縣人三歲而孤事大母以孝聞
至正十二年紅巾賊破松溪昌元慨然出其資往
處之青田龍泉募敢死三百餘人又集社甲數百
人奮勇殺賊賊皆潰去已而賊復來攻縣甚急昌
元請援於浦城賊夜襲之兵潰昌元與潘伯正復

松溪縣志

卷之九

人物志

二十七

惠在浦城南岸皆爲賊首細亦招集黨類將
期日舉逆謀邑人大恐昌元購得其私書夜密與
縣定計至四鼓發兵執細殺之及其黨七十餘人
阿思蘭以昌元隄備白嶺十五年山後賊連五人
攻破政和縣阿思蘭復請昌元爲總督昌元糾合
萬有三千餘人團結忠義大社出界首寨嶺楊梅
林分屯以待之賊盡銳來攻昌元擊之每出必捷
不敢復至青田山後賊來犯松溪至梓亭昌元率
兵屯巖下輒敗走之至正十八年省府以建寧路
官授本縣主簿賞不酬功人皆惜之

明

夙道暹字志彰本縣人素以好義爲鄉人所推服
景泰初強賊攻縣治道暹奉檄親詣賊巢撫諭生
擒賊首二十餘名招撫人民一千餘家天順末流
賊聚劫縣境道暹復奉檄招募民快自輸糧餉竭
力隄備後復親犯矢石斬獲賊首張記得等境內
以安鎮巡官上其事授本縣巡檢專督捕事

松溪縣志

卷之九

人物志

二十九

張德本縣人雅負義氣膽力過人嘉靖間倭犯縣城城中拒守三越月倭造雲梯高與城等一倭舞刀跳入德揮斧斫之餘倭尾而上者俱應手砍墮城下以火藥擲燒其車明日賊不敢近惟以鉞彈遠打城上德不避險竟爲流彈所斃倭解去所全一城生靈德之力也有司建祠春秋祀之名曰永庇其禦倭始末別有傳

陳椿字月泉邑諸生嘉靖壬戌十二月倭寇圍縣衆推椿督守八門時令命椿逆戰自晨至晡大敗

松溪縣志

卷之九

人物志

三十一

之次日賊復以車梯攻四門椿統兵壁洲進戰復大破之炮火燒椿髮猶督戰不休倭氣始奪正月援兵至倭拔寨去椿率衆往各營收瘞死於陣者兼請旌節婦某某萬曆丁酉推官許時謙採訪群議謂當時督理兵務陳椿之力居多後以言忤當事生革去功怨兩未白宜闡而祀之今議補祀

禦倭附

陣亡張德曹成葉朴楊三范隆曹珊程叙范暹葉洪潘廷備范廖清何芳嚴孟進楊孫卽劉清蔡逢

全黃升陶馬惠機夏長范受安魏杭馬欽夏二葉

銓潘奴江勝金三范可久董烏三金汶游好鄒榮

呂胡璘曹璘范安

以上三十五人皆奮力死敵功蹟昭著者

連三楊周陳謙嚴惠賜徐中秋曹惠安葉昭何于

鄭佛成江覓范惠政陳宗范進黃祥范長龔廣陳

五邵仁德嚴五即黃

旺

龔尚楊覓三李受陳賜黃

胡陳蠻王田慶吳孟范奴游明嚴惠潭葉胡仔范

鳴鳳楊管五范添貴陳杞陳金游松王章陳仙琳

蔡榮張四嚴三金五吳惠季騰張厚程宣范佛招

松溪縣志

卷之九

人物志

三十一

王福 以上五十人俱被鏡傷而斃于倭難者

紳士 金長庚范茂先陳椿真桂黃淵陳梧黃良

材 以上七人皆運籌制勝冒死督兵者

義士 陳暄魏涇魏鏘陳旦艾成章陳奎王淵陳

時安葉亨

以上九人皆督兵濟餉率民效死者獨陳暄別見隱逸

義總 方明惠葉淵游尚桂葉惠泰楊惠徐道魯

蔡逢岳葉惠峯楊惠宗楊仕升楊覓六雷鑑楊景

福葉長松葉淳葉宗珪李明嚴子懋潘暹

以上十人或

衝鋒破敵或獻策定謀要皆有功於戰守者

陳碧陳清陳嘉誥李唐張

鑑魏七葉尚桐曹球吳養黃滋唐九曹鑑十二人皆助陣

張文鑑黃沛二人捍患立功當時省祭

吏曹淳江世保張鏘詹伯温何起龍五人督戰以全城池

兵李仕清朱蓬毛楊六范潮范烏頭劉毛檜葉

浹王花牛葉尚儀蔡馬四楊褒連環黃宗華陳錢

何海柯惠賜鄧銀尹浩鄭馬貴鄭牛牯鄭智軒黃

宗保董子英楊錫詹妹孫楊烏八葉山六王德二

江四陳山六黃淳陳永吉庚達方明鑑王六吳祥

張惠玉范廩艾八以上三十九人皆昂死迎戰者

松溪縣志 卷之九 三十一

方浩方春徐祐吳乾傅增張智吳三李華黃津項

安嚴鎧方德陳三寶陳勝祖蔡厚江五何明何完

支璠葉谷即葉佛壯方豹葉袖黃全吳斌楊文毛

坦保以上二十七人皆登敵臺以銳箭傷賊者

又有獄囚立功如劉福江拱二人登城以藥矢言

斃六賊下城以篋筦破敵軍四次又施地鈎制賊

不敢渡河

孝弟

元

葉雋字良弼景仁子祖母施年高足疾雋與姊昇而起臥者數年父景仁討賊遇害乃傾家貲購壯丁從間道入賊境殺其渠魁擣巢穴以報父仇因得父屍歸葬有司以父子忠孝聞授進義校尉同知南豐州事雋辭不就廬於墓側遇節旦輒匍匐墓門悲號久之有芝草數莖生於隧道

葉盛字德盛本縣人與兄茂以奉檄監坑冶自邑徙居遂應場有王華者家於場之下塘橋華故劇盜與盛兄弟有隙一日佯爲好言誘茂盛至則閉

松溪縣志

卷之九

人物志

三十三

諸室將殺之茂度不兩全麾盛速去曰俱死無益吾已有室家子尚未娶歸存宗祀可也盛泣而踰垣華覺提刀將追去茂截於門曰汝弟殺我一人耳遂被害盛避迹他所教授爲事每置兄木主於几案遇節祠祀之三載之後告其生徒俾助薪芻乃夜抵華舍縱火焚滅殆盡歸葬其兄寶珠山下表曰義墓盛卒門人私謚烈齋建烈齋先生祠祀之

明

葉惟周本縣人少孤竭力事母母多病躬究醫書一日母自外家遭疫還其家死者六七人惟周在側頃刻不離疫不能染母病亦愈及母終哀毀骨立喪葬亦循家禮鄉人稱之

陳閻字思敏本縣人當坑賊攻縣負母逃山林得免及母終廬墓三年朝夕哭奠聞者哀之

葉奇縣之在坊人賦性端慤少失怙事母至孝母壽七旬有餘而終家貧竭力葬祭鄉里重之

夏福本縣人隆慶間戍福州衛父病篤思見福遣

松溪縣志

卷之九

人物志

三十四

人通之福聞痛絕請於天割雙臙肉持歸父病瘳事聞兩院給扁旌之曰割臙之孝

魏文楷本縣人邑諸生性孝謹嚴冬母病思溪中蓮實楷嘗讀書妙峯山憶山中蓮池其泉獨暖蓮多後槁走覓果得一莖持歸啖母母病遂蘇伯父無子族衆爭嗣訟於官郡守龔公判楷應繼有田六十畝楷不受願以半奉伯祀以半讓季父之極貧者守甚高之贈以手書云孝感青蓮如生孟笋讓追孤竹再合田荆及申開巡院批獎云孝母獲

異蓮之徵輕財推應繼之產後經提學獎厲命其
其事於學宮以風士類

葉大成本縣人孀母嚴氏病逾三載大成日夕侍
湯藥求醫禱神心力殆遍一夕夢老人示之曰此
去南門外大士堂前有草葉如線取服卽愈覺而
如其言取之味甚甘搗汁和藥以進母服之果愈
年至八十而終喪葬如禮

葉新魁本縣人五歲喪母祖母鄭氏撫養成人鄭
病篤魁侍奉不離左右求醫無效顙天割股和藥

松溪縣志

卷之九

人物志

三五

始愈妻亡誓不再娶鯨守終身

黃澹字得冲邑諸生少失父一日母哭父領開不
能闔澹禱於湛盧夢神授以瀘灰及歸母日夜夢
兒瞰我藥今能開闔矣娶謝氏生一子妻卒終不
再娶壬戌倭襲縣澹率子弟數百人禦之後以明
經授泉州訓晚從李見羅先生遊學益進年八十
四終

葉伯生本縣人其弟伯英爲宛平縣丞父潤秀因
就養宛平卒於署二人扶襯歸葬喪行古禮伯英

以家事屬兄而自築室於墓旁居二十餘年兄弟相愛嘉靖中邑令扁其堂曰孝義旣而府道院俱命題獎隆慶間縣舉伯生爲鄉飲介歲給粟帛萬曆元年司李郭扁其廬曰昆仲孝友六年以恩詔給兄弟冠帶九年舉伯生鄉飲大賓兄弟俱八十餘

葉允升本縣人髫年讀書手不釋卷侍母疾衣不解帶焚香籲天願以身代族黨咸稱其孝邑令申聞學院命加旌獎

松溪縣志

卷之九

人物志

三六

葉茂春故孝子伯生之孫父應逢病篤春私自割股調羹以進父尋愈暮年母黃氏病春日身體髮膚非所愛也復割其右股和藥進母服之立愈宗黨異其事邑令華士嶠扁其門曰孝行克敦

黃一材本縣人教授鄉閭奉母能盡承歡之節嘗以割股療親疾而愈邑宰呂繼梗華士嶠並旌其門

施子三本縣人家貧奉母甘旨不缺母病割股調羹以獻母病尋愈邑令呂繼梗扁其閭

曹應麟本縣人母病篤倉皇無措號天而哭幾不欲生輒引刀割股具湯奉母詰旦母思甘食病忽愈邑令劉一燦旌其門

許若孟本縣人母潘氏病危若孟竭盡醫不效因割股調藥以進母垂死復甦曰頃有持鹿脯命余啖之覺四肢稍自適矣邑令劉聞之旌以粟帛扁其門

艾文燁本縣人事親孝曾以割股愈母疾未幾父病文燁侍疾過於母崇禎三年按院羅公扁其堂

松溪縣志

卷之九

人物志

三七

曰孝行可風後任張公獎其門曰誠孝孚格俱有願賚

楊榜字題黃本縣人崇禎二年選貢事母孝以德行申督學者七報巡按御史者五邑人重之

江賦邑諸生家貧母性嗜魚冬月輒往溪畔取魚供母母病籲天願以身代母沒後隱居退谷著有詩集一卷

黃心友本縣人時下令赦諸罪囚心友有父仇亦在赦內邑令破械出之心友袖斧往候械方解而

斧及焉誤砍其肩令以違旨解憲憲司判云當堂一斧無異博浪一椎是深於讀復仇論者也可勿問戒囚越境以避之心支父名熙鼎邑庠生

國朝

江日采順治初驟傳王師至父兆恒遽出城南日采奉祖母携妻子從之趨西北嶺師已集郊外兆恒爲游騎所殺日采趨至抱屍慟不已旣而後隊至叱其去哭如故復叱之已而師大至遂被害

范士明字温哲邑諸生少攻書史事親孝母病七

松溪縣志

卷之九

人物志

三

年晨夕侍湯藥不少懈及病篤割股以進母幸延四十餘日後居母喪哀毀骨立未幾父寢疾復竭力以營醫禱里閭稱之

江弘濟字伯潤明末以邑諸生貢于鄉性孝友值母喪與弟永濟水漿不入口者七日弟歿經理其事倍異恒情宗黨重之

隱逸

宋

陳紹宗咸淳中屢舉不就鄉人稱晦堂先生

明

陳暄字鼎和嘉靖中選貢嘗遊于太學大司成鄒公東郭深器之及丁內艱居廬哀毀暄爲銓部李公默門下士人多以仕勸之暄曰夫子調孝友于家是亦政也有司禮請鄉大賓不就日以詩酒自娛教誡諸子弟唯謹年八十九卒

范浩字宜養嘗遊於葉臺山鄒南臯兩先生之門及鄒延之館欲爲繼娶浩辭曰幸有嗣足承祧其他非所望也時人聞而義之浩歸日南臯賦詩送

松溪縣志

卷之九

人物志

三九

之

陳有祚字永錫號燕及天啓甲子舉於鄉性磊落少所許可崇禎末有高蹈志時寓松者林增志周之夔劉中蒸金堡路振飛湯芬朱積輩與有祚爲血性交每念時艱輒同飲泣又嘗遊石倉石齋之門故其所學愈富後唐藩監國數辟之第搖手而已鼎革初杜門謝賓客大兵入建寧一夕棄家去久之友人遇於浙曰來日于此訪我友人如期往則見酒肴甚備促膝宴言都饒雲霞氣友人知其

有遇也詰曰往謝之則已不知其所往矣大約往來于浙東諸山水十有餘年而沒所著書其九種有臬臯子傳載藝文志

文苑

明

葉固字廷堅唐建州刺史顯之後性樸素自幼嗜學能詩文永樂中舉楷書赴京預修永樂大典與祭酒胡儼爲文字交

楊茂字叔亨正德進士少有詩文名弱冠舉於鄉

松溪縣志

卷之九

人物志

四

賜第卽告歸養居湛廬山六年學益進起授評事轉陞江西僉憲未至任卒年三十二所著有湛廬山人集

范茂先字華甫工古文詩歌有寄嘯集邑人魏潛稱華甫詩自屈宋西京以下及元和長慶靡所不窺不庸斤求似往往合之嘉靖間首主禦僕之策卒全其城

陳木字可棟工古文詞與陳至言葉紀范茂先魏濟同名時稱五才子有集行世

葉紀字朝至通遊都會與王百穀鄒南臯曹能始
輩相酬和有北游草空谷集

陳聖鎔字子中家湛廬之陽性慕古喜積書嘗建
友書樓於城隅自經史而下以及諸子百家稗官
野乘靡不搜致

李鏗字進夫蒼梧守扶裔孫扶之祀於鄉賢也嘗
以狀請於學博操松爲之立傳嘉靖丁酉與同學
陳暄董蘇輯邑乘十四卷

黃澗號晚江邑諸生居平智識迥出人上尤工於
松溪縣志

卷之九

人物志

四

詩歌古文詞倭寇圍城時屢陳方畧城賴以全官
終廣東韶州府通判

陳銓字士衡清慎有才譽事親孝居喪毀瘠平居
以書史自娛士大夫多折節下之歲舉鄉飲酒禮
必入爲賓介

董蘇字子陪嘉靖間歲貢性嗜學工古文辭時與
李鏗陳暄同修邑乘采摭討論蘇之力居多

葉樞字機仲天啓初領武闈鄉薦少忼慨有大志
巡撫南公辟爲中軍參畫後以詩賦受知於曹石

倉先輩所選十二代詩樞崇禎末客都下聞變自
拂衣歸里杜門讀書所著有駢文玉楮一卷卒年
七十

傅三捷少遊于魏中丞之門自六經二十一史山
經地志以及讖緯圖錄醫藥卜筮之書靡不畢覽
晚年或棲僧舍或居山谷踪迹飄然自號豹隱
陳大養字茂正邑諸生端方篤學事繼母以孝聞
魏中丞濬屢書辟之辭不往其學大約以陽明知
生致良知爲主晚年受業者百餘人

范聞詩字本言少讀書工制舉業屢躋不售遂潛
心理學適見羅李先生謫閩往師之從遊者數百
人聞詩獨傳其學崇禎八年任金華府訓導人德
其教爲之立祠勒碑載其事九年七月卒于官所
著就正錄善過自知錄愧弓草行於世

陳鑰字聖啓西甌孝子榮八世孫三傳至澤徙松
溪鑰少讀書於外家林氏林有書數千卷鑰研窮
朝夕每一卷畢則潛思默坐求其始終嘗曰學在
發明經傳知先儒真實工夫始覺此理爲吾所有

便能尋向上去次則信服其言反身自治亦不失
爲儒者因著教詒錄庭訓錄卒年八十三

國朝

艾逢節字際泰崇禎末以明經任福州府訓遷國
子監學錄淹洽博聞聚書數千卷晨夕手一編不
輟唐藩辟爲國子司業一見辭歸晚年息影廬峰
之下以琴書自娛年六十八終子敏杜門歛迹克
承父志有詩集一卷

葉國銘號圖磨以拔貢任雲南曲靖府通判致仕

松溪縣志

卷之九

人物志

四十三

後囊橐蕭然講學城南書舍一時文士以文章經
濟相推尚云

邵廣貞號杲菴少嗜學於六經諸史無所不究時
與邑人黃熙豐皆以引進後學爲已任所著杲菴
集行世

黃熙豐字雲穰宋儒勉齋先生裔孫性明敏嗜古
嘗構書室於禪巖山歷四十餘年閉戶潛脩究心
理學淹貫先儒註疏闡發聖賢蘊奧一時從遊者
四方雲集著有四書講義易學詩義息石山中人

集卒年七十有三弟黃熙岳性孝友喪父於孩提孺慕終身不爐不扇奉母克何色笑母疾醫治需鯽冒雪求之暮歸東平天假空舟濟渡事兄撫姪極盡其道鄉黨群推爲孝子云

陳道法字言可篤信朱子之學持身不苟孝友無間教授城南從遊者百餘人一時翕然師事之所著有論古管見四書辨疑理學一得錄康熙乙亥任汀州府永定縣學訓年八十三卒於家

方伎

松溪縣志

卷之九

人物志

四

明

陳友貢永樂十六年舉楷書預修大典辭闕歸里同時李子正以十八年舉赴銓貢尋以疾辭

劉銘字思永以楷書生員入國學拜工部主事魏孟堅精尚星學縣舉鄉飲不就奉恩例冠帶壽一百歲無疾而終

夙清耳目聰明能鏤刻金銀器鄉居六十餘年不履城市壽至一百歲而終

國朝

范嶽甫字和生聞詩孫雖工帖括爲諸生無榮進
意喜畫山水遇有泉石古蹟輒爲之圖

恩贈

宋

吳槩字平仲慶曆進士官終秘書著作郎以子執
中贈正奉大夫

陳傳官至開封府書記以子戩贈通奉大夫

明

楊溥以子茂封文林郎大理寺右寺右評事

松溪縣志

卷之九

人物志

四十五

嚴賢以子鎮贈承德郎靖江王府長史司審理所
審理

葉宗本以子逢陽贈奉直大夫南京戶部江西清
吏司署郎中事員外郎

魏鏘字希玉號崑峰以子濬贈大中大夫山東布
政司右叅政

真粹然字潤庭以子憲時贈中大夫江西布政司
右叅政

附義民耆碩

范文正洪武初捐貲獨建橋梁七處里人德之稱
爲七橋居士

夙希達字彥綸好施予不干仕進正統間出穀備
賑有司上其事旌爲義民勅曰國家施仁養民爲
首爾能出穀一千石用助賑濟有司以聞朕用嘉
之今特賜勅獎諭勞以羊酒旌爲義民仍免本戶
差役三年尚允蹈忠厚表風節聞用副朝廷褒嘉
之意欽哉故勅

魏永嘉以孝行聞性喜周恤貧困正統間出穀備

松溪縣志

卷之九

人物志

六

賑有司上其事旌爲義民勅辭與夙希達同

葉貴嘉靖六年歲饑有司勸借稻穀一千石備賑
申達當道給以冠帶

楊普惠偕其子相捐金二千兩創建城南橋及暨
拱月臺縣申院道旌之榮以冠帶禮請鄉飲賓
葉章嘉靖中任江西大庾縣知縣致仕歸家居五
十餘載孝友一門建南道王公可大造廬訪焉扁
其門曰百歲卽官第壽九十八終

楊成賢由拔貢爲江西瑞金訓導以父艱歸治喪

盡禮奉母不復仕縣舉大賓者九卒年九十一
陳紀性孝友而好施與嘉靖倭亂出困粟以餉士
倭退後復輸穀入義倉縣禮大賓榮旌冠帶
葉惠福性耿介未嘗一詣公庭隆慶二年申請冠
帶給扁旌獎卒年九十二子文敷兩中鄉試副榜
有美才早卒

陳綱性篤宗盟嘗置祭田以供祀事嘉靖中惠政
橋燬募建浮梁以通病涉復築陂以救埏田之旱
修砌以平辛起之路綱壽九十五子旦年逾九十

松溪縣志

卷之九

人物志

四七

次子晨八十二人稱壽考一門云

陳時昇端慤勤慎素行爲宗黨所推每以節齋操
家而樂於施捨如修萬觀橋及葺南山觀獨捐金
六百兩其實績也後舉鄉賓以壽終

國朝

陳又實字次弓邑諸生少失怙恃杜門力學日錄
功過自程期於利物康熙壬子獨捐貲重整學宮
邑人有喪而窘乏者每助以棺計先後共五百餘
家又遠近橋梁多其所修葺賑孤寡周急難種種

施與又其餘事

葉呈春喜施予端慤自持又嘗遇橋梁傾圯倡募修葺曾舉鄉飲年七十五卒

列女

元

黃氏名妙銖李述父妻至正丙申青田寇侵縣治黃氏時方盛年與羣婦逃匿山谷爲盜所執義不受污賊怒驅迫以前行數里經高崖數十丈奮身投下盜意其必死舍而去其夫暮至踪迹得之昇

松溪縣志

卷之九

人物志

吳

歸遂甦

范氏名回葉彥寬之妻至正間彥寬授政和縣簿未任而沒范方盛年一子尚幼立志不嫁孀居五十餘年始終一節人無間言年八十終

明

黃氏名妙瑩葉繼生妻洪武間山寇擄掠至其家以劍砍繼生氏見夫被傷卽出救以身蔽之賊砍氏至氣絕而身不動寇愕然棄去夫得免死

嚴氏名妙音楊繼義妻義以事逮至京死氏甫二

十有一生子孟貴方九閱月矢志撫孤誓不再嫁
縣申題獎

嚴氏名完江克俊妻年二十生子濬未晬而夫亡
家業微薄事姑年八十餘終喪葬以禮子濬又卒
撫育二孫至於成立志節堅白無罅可議

馬氏名妙瑄葉濂妻年二十夫疾語之曰吾死無
後汝將何歸氏曰吾亦有死而已及濂卒氏遂拔
刀自刎家人急趨救之得不死以全節終

李氏字翠娘葉廷寶妻年二十五而夫亡紡績自

松溪縣志

卷之九

人物志

四九

給撫育二孤繼安繼鎮日就成立嘉靖十二年有
司覈實奏請榮加旌表

范氏楊惠林妻年十八而夫故且無子舅姑欲嫁
之氏誓不從遂取族人子臣以爲後有司覈實奏
請題獎

林氏邑庠生真序妻嘉靖中序往郡舟覆須臾而
沒氏年十四泣請於族而以次房兒樞爲嗣及卜
墓囑樞作雙塚葬之口隨夫柩入願以身殉姑泣
曰我年已老汝死則我隨之於全節得矣其如孝

養何強扶出之後姑亡氏年二十有七爲姑殯於外以簪珥分諸妯娒及以笥中物授樞曰吾事畢矣遂不食越十有五日而卒因合葬焉

范氏乳名佛姑嘉靖末廣賊臨境氏避寇入山爲賊所執至東嶽廟衆婦相隨氏獨扳門欄不肯進賊憐其容貌不忍殺因執往水東至東平渡氏遽拾石塊自擊其頭流血被面躡身赴水賊怒殺之年二十二

葉氏村民江華妻嘉靖間遇倭亂與嬪氏陳應娘同日死節

松溪縣志

卷之九

人物志

五

陳氏應娘江憲勝妻嘉靖壬戌倭襲城舉家避匿長潭時有欲覓剃刀薙髮弗得江華妻葉氏出諸懷中衆婦愕然葉曰設不幸爲賊掠藉此可以自刎旣而賊圍長潭執應娘并葉氏繫以一繩葉謂陳曰予與若今日被擄豈望生還不如早爲之計陳曰諾葉引手覓刀則已墮于水中遂相牽跳潭水而死

陳氏葉孜妻孜亡而一子甫週隆慶二年隣舍失

火廬屋被焚氏號泣曰天乎家貲不足惜倘災及舅姑兩樞妾命休矣遂伏於樞不離煙焰火及前廊須臾返風而息

范氏名惠女林受妻嘉靖壬戌避倭匿廖墩賊掠氏及衆婦氏獨抗節不屈或勸且暫允明日家中納來贖氏曰身可贖羞亦可贖乎我寧死賊聽其言虜殺一幼女以懼之氏顏色不變賊曰不從將及汝矣氏曰速殺我無多言遂遇害年二十七

范氏勉娘葉宗儀妻年十七夫故無子姑欲奪其

松溪縣志

卷之九

人物志

五

志氏抱木主夜歸母家相持而哭氏旣依母日呼天飲泣立誓益堅縣令黃仕爲之惻然嘆曰石之硜硜猶可以磋鐵之錚錚猶可以磨有女烈烈矢志靡他視死如飴潘辟愧嗟氏臨終惟求夫之木主並葬嘉靖中知縣閔魯申聞院道時郡舉節婦八人而氏居其一

陳氏名賽娘楊國資妻年十七夫亡無子立夫兄弟各一子爲嗣事姑孝課子嚴萬曆四年捐貲建文奎閣于學宮勉其嗣子繼新之列于庠故也

遵歷行旌獎

陳氏例貢葉培妻少嫻女訓善事舅姑夫亡無子立猶子爲嗣捐田二十二畝入學宮養賢院又葉氏董用賓妻亦以田二十餘畝充入學宮並記載門之石

童氏年十八適陳本仁二載夫故孀居苦節撫孤於成萬曆二十年有督學徐公旌扁又江鏗妻陳氏年十八守節侍姑育子終身無倦亦以節終

何氏葉文祥妻祥沒氏年二十八事姑黃氏祖姑

松溪縣志

卷之九

人物志

五十一

謝氏甘旨無缺二姑皆年近百歲人以爲孝感麻致萬曆二十四年副使徐扁旌其廬

嚴氏爲葉瑄之妻止二十餘日瑄卒哀毀絕食姪與姑泣而慰之遂謝鉛華屏服御每遇歲時設蔬醴以祭哭甚哀聞者爲之惻然氏無依依母母氏年六十四念無老死於嚴之理復歸于葉萬曆四年知縣戴鏗獎之曰節婦嚴氏甫一月而居孀始終遂無變志年十六而守節內外俱無間言理宜優旌以揚苦節申聞督學王旌之仍具題奏

年八十三 又魏氏葉世洪妻

宋氏徐大杞妻事姑以孝聞生二子杞卒氏年二十因作墻以限中外雖三尺童子罕見其面曾鑿井於墻內而泉隨湧出今其家猶呼宋氏井云
附記蔡仲妻王氏壽一百零三歲隆慶三年知縣萬鈞申聞道院題請旌表東畚有百歲坊
葉漢妻許氏壽一百歲年二十二夫卒守節八十載嘉靖庚辰知縣閔魯立坊旌之額曰堅貞百歲之門歲給粟帛與肉

松溪縣志

卷之九

人物志

五十三

范中行妻陳氏年二十夫卒撫遺腹一子苦節終身又性喜利物捐貲獨建城南小橋橋成邑令扁其梁曰德濟壽至九十三歲而卒

國朝

葉氏邑人有北妻丁亥之亂同夫匿鄭墩山廠突遇游兵掠廠見氏姿色甚麗將污之遂殺其夫而抱氏于馬上氏憤跳下馬大哭不從賊竟殺之
勝娘真中丞子金鉉妾也鼎革初真氏全家被逮鉉亦被殺勝娘大哭曰吾得從主人于地下足矣

卽跳水死

范氏葉元標妻標卒時氏年二十撫一子三歲有勸其改適者氏叱之撫孤成立苦節幾四十年順治癸巳知縣高光國扁曰潔志成名卒年七十楊氏范蘭懷妻年二十八夫亡守志五十三載冰蘖自捺撫其子伺讀書肄庠康熙二十二年疏請建坊旌表

陳氏邑諸生葉聯芳妻年十八而于歸甫生子而夫歿茹荼飲冰者歷今三十八載戚屬無間言

松溪縣志

卷之九

人物志

五十四

范氏艾元潤妻

仙釋

唐

伏虎禪師唐景福元年鄉人集衆捕虎師忽騎虎而出人皆駭異由是遠近聞之爭出帑藏以建梵宇迎師居之卽今之中峰寺也旁有伏虎壇石迹猶存

宋

慶餘宋元祐間隱于中峯與松溪尉李夔數以手

書問答禪契深密闡發詳明

元

無垢禪師俗姓凌古田人至元辛巳寄迹於松溪嘗牧牛于七峯山遇異人授以神術遂就本山雲際庵薙髮自號無垢入市乞米必買肉一塊人竊疑之踵其武而窺之至深林一虎出迎飼之卽跨而去自是不復出大德戊戌結木榻於蓮花峰趺坐而化遺蛻塋朱源之北山因塑像於雲際庵歲旱禱之輒應

松溪縣志

卷之九

人物志

五十五

吳華邑人也至正間棄家修鍊於瑞岩庵四十餘年庵旁蒔蔬有盜之者多跣其足每織屨懸樹間鬻之得錢以給貧者人有病疫迎華入室焚香祈禱無不立愈後因覓匠籊桶華忽誦曰一片無情木修圓內外空要知端的處無漏是成功言訖遂化鄉人稱之爲吳道者

少林崧禪師本縣人住杭州徑山爲三十三代祖有語錄十卷見府志

明

棲霞山人未詳其姓氏邑里寄迹於東關棲霞道院垂十年既又自號海門子雖賢士大夫訪之不交一語後不知其所終

照中禪師志璟俗姓繆連江人幼年就建寧光孝寺可庭師學佛道資天成頓徹三乘旅食普載龍象爲之一新正統六年十月七日別其徒而化越六十有七年法嗣吉祥建塔于柳際寺之東山而葬焉

釋弘恩明瑞昌鎮國公第四子生而岐嶷性不樂

松溪縣志

卷之九

人物志

五十六

俗父偏婚娶不從遂抵信州叅禮博山剃染受具退依雪關閭禪師息影三年機鋒峭利迴別頑禪嘗示衆云旣生人道出世一場不做些好事積些好德是空向閭浮走一遭也崇禎未駐錫松溪重構萬山古寺有題齋堂句云時烹無米供雲水別煮三千款世情丙戌八月示疾辭衆而逝法嗣傳恐建塔於萬山之右弘恩慧中秀外博極群書能爲詩歌古文辭禪林多梓其語錄及別集行世

流寓

周

歐冶子越人越子允常使鑄劍於湛廬山蓋三年而劍始成後人卽其所居立祠祀之

五代唐

孟仁擇爲唐銀青光祿大夫位尚書由陝寧遷居邑之皈伏里建羅漢院於金山之麓洪武間改院爲寺寺在縣東十里許舊有碑載其事

五代周

吳十七諫議仕周爲諫議大夫寓居於遂應場闢闢田野教民耕作旣沒鄉人思之立祠以祀今遂應場吳姓者皆其後也

松溪縣志

卷之九

人物志

五十七

宋

王安石字介甫號半山出翰林學士位宰相自其父益尉松溪生安石於署之劍峯堂邑人爲之建坊額曰誕生宰輔蓋誌安石與李忠定公綱也後安石以觀文殿大學士封荆國公元祐間薨

李綱字伯紀父夔爲松溪尉生綱後登政和二年進士歷官至宰相薨年五十八贈少師諡忠定事

詳理學別有傳

朱熹字元晦號考亭又號紫陽中紹興十八年進士仕於外者九考後除煥章閣待制侍講辭職謝事卒贈太師追封徽國謚曰文始文公父松尉政和葬父退翁森於護國寺寺距湛廬山二十里許文公因往來祭掃築吟室於廬并僑寓於城今湛廬書院及文公祠巷其遺迹也

元

楊纓號釣溪龜山先生七世孫自將樂徙居縣之

松溪縣志

卷之九

人物志

五十八

壽安坊克湛廬書院山長建續賢菴於湛廬之麓并置祀田有記入藝文

